



UNIVERSITETI I
GJIROKASTRËS
Universiteti "Eqrem Çabej"

**DREJTORIA E PËRGJITHSHME E
PRONËSISË INDUSTRIALE**

**UNIVERSITETI "EQREM ÇABEJ"
GJIROKASTËR**

Nr. 1072 Prot.

Nr. 104 Prot.

Tiranë, më 28/03/2024

Gjirokastrë, më 28/03/2024

MARRËVESHJE BASHKËPUNIMI

NDËRMJET

DREJTORISË SË PËRGJITHSHME TË PRONËSISË INDUSTRIALE

DHE

UNIVERSITETIT "EQREM ÇABEJ" GJIROKASTËR

Me qëllim nxitjen e zhvillimit në fushën e shkencës dhe teknologjisë dhe inkurajimit të punës shkencore dhe kërkimore në Shqipëri nëpërmjet:

- Rritjes së ndërgjegjësimit të studentëve, stafit akademik dhe profesionistëve të përfshirë në punë kërkimore dhe shkencore, për të drejtat që ata gëzojnë mbi punët e tyre;
- Krijimit dhe vënies në dispozicion të tyre të një sistemi efektiv të informacionit për arritjet e mëparshme (shpikjet) në fushat e ndryshme të shkencës;

si dhe;

- Duke parë nevojën për bashkëpunimin, shkëmbimin e informacionit dhe mirëkuptimin dypalësh mes dy institucioneve palë në këtë marrëveshje, në arritjen e objektivit të mësipërm;
- Dëshirën e mirë për krijimin e kushteve të përshtatshme për zhvillimin e lidhjeve dypalëshe;
- Mbështetjen për mundësinë e kryerjes së praktikave të studenteve pranë DPPI-së
- Mbështetjen në parimet e barazisë dhe përfitimit të përbashkët;

Lidhet kjo Marrëveshje Bashkëpunimi midis palëve:

Drejtoria së Përgjithshme të Pronësisë Industriale (në vijim **DPPI**), me seli në adresën Bulevardi “Zhan D’Ark”, Prona nr.33, ish Shtëpia e Ushtarakëve, Tiranë, Shqipëri, përfaqësuar nga Drejtori i Përgjithshëm, znj. Rovena Beqiraj;

Universitetit “Eqrem Çabej” Gjirokastrë me seli në adresën, Rr. Studenti 30 Gjirokastrë, përfaqësuar nga Rektori, Prof. Dr. Bektash Mema;

Të cilat, këtu e më poshtë do të njihen si “palët”.

DUKE QENË SE:

DPPI është institucioni përgjegjës për regjistrimin, administrimin dhe promovimin e të drejtave të Pronësisë Industriale në Shqipëri, midis të cilave dhe të drejtat e shpikësve mbi: Shpikjet dhe Modelet e Përdorimit; Disenjat Industriale, Topografitë e Produkteve Gjysëmpërçues; institucioni që krijon, ruan dhe administron bazën e të dhënave për këto objekte të Pronësisë Industriale si dhe institucioni përgjegjës për zhvillimin e politikave për promovimin e këtyre të drejtave;

dhe

Universiteti “Eqrem Çabej” Gjirokastrë u krijua me vendim të Këshillit të Ministrave nr. 414, datë 12 nëntor 1991, mbi bazën e Institutit të Lartë Pedagogjik që ishte çelur më 1971. Ai është institucioni më i rëndësishëm arsimor, shkencor e kulturor i rajonit jugor të Shqipërisë. Në jetën e tij mbi 30-vjeçare Universiteti i Gjirokastrës ka diplomuar studentë në të dy sistemet e studimit, të cilët shërbejnë në fusha të ndryshme të dijeve dhe shkencës duke dhënë kështu një kontribut të vyer në arsimin tonë kombëtar. Universiteti përveç një stafi mjaft të kualifikuar, është i pajisur me laboratorë, kabinete dhe një bibliotekë shkencore. Gjithashtu Universiteti është edhe qendër e rëndësishme kërkimore, shkencore dhe botuese. Aktualisht **Universiteti “Eqrem Çabej”** i Gjirokastrës ka në përbërje tre

njësi kryesore: Fakulteti i Edukimit dhe Shkencave Shoqërore, Fakulteti i Shkencave Natyrore dhe Fakulteti i Ekonomikut.

Palët bien dakord si më poshtë:

Neni 1 Objekti

Objekti i kësaj marrëveshjeje është bashkëpunimi mes palëve për:

- a) Rritjen e ndërgjegjësimit të studentëve, stafit akademik shkencor, shpikësve dhe profesionistëve të përfshirë në punë kërkimore e shkencore, lidhur me rëndësinë e mbrojtjes së të drejtave të Pronësisë Industriale, si të drejta që u takojnë ekskluzivisht shpikësve dhe që ju sjellin atyre, përveç përfitimit moral, edhe përfitim ekonomik, si rezultat i shfrytëzimit të shpikjeve në industri;
- b) Krijimin e infrastrukturës së nevojshme për vënien në dispozicion të studentëve, stafit akademik dhe shpikësve, të informacioneve periodike lidhur me arritjet e mëparshme në fushat e ndryshme të teknologjisë (shpikjet e bëra publike) si dhe të informacionit të nevojshëm lidhur me të drejtat ligjore që gëzojnë shpikësit dhe mënyrat ligjore për mbrojtjen e këtyre të drejtave.

Neni 2 Qëllimi

Me qëllim realizimin e objektit të kësaj marrëveshjeje, palët angazhohen në realizimin e aktiviteteve të mëposhtme:

- a) Krijimin e Qendrës së Informacionit Teknik dhe Shkencor pranë **Universitetit “Eqrem Çabej”** Gjirokastrë.
- b) Zhvillimin e aktiviteteve të përbashkëta si seminare, konferenca, ekspozita, trajnime të ndryshme që kanë për qëllim ndërgjegjësimin e studentëve, stafit akademik dhe kërkimor-shkencor për rolin që ka mbrojtja e të drejtave mbi shpikjet në zhvillimin e shkencës dhe teknologjisë në vend.
- c) Përgatitjen e materialeve informuese dhe promovuese;
- d) Shkëmbimin e informacionit dhe publikimeve të ndryshme;
- e) Çështje të tjera me interes të përbashkët.

Neni 3 Detyrimet e Palëve

Në realizimin e aktiviteteve të parashikuara në këtë marrëveshje:

- a) DPPI merr përsipër të vendosë në dispozicion të **Universitetit “Eqrem Çabej”** Gjirokastrë, materialet informuese, specialistët dhe ekspertët që do të ofrojnë seminare apo trajnime për stafin akademik dhe shkencor në fushën e Pronësisë Industriale;
- b) DPPI merr përsipër të vendosë në dispozicion bazën e nevojshme materiale për Qendrën e Informacionit Teknik dhe Shkencor, sipas listës në Aneksin I të kësaj marrëveshjeje.
- c) DPPI merr përsipër, me kërkesë të Universitetit dhe bazuar në mundësinë dhe kushtet, rast pas rasti të pranojë realizimin e praktikave të studentëve pranë DPPI-së.
- d) **Universiteti “Eqrem Çabej”** Gjirokastrë merr përsipër të ofrojë ambientin e përshtatshëm, ku do të vendoset Qendra e Informacionit Teknik dhe Shkencor, përkatësisht në bibliotekën e Universitetit si dhe stafin e nevojshëm për funksionimin e kësaj Qendre.

Neni 4

Detajet e organizimit të aktiviteteve

Detajet lidhur me realizimin e aktiviteteve të parashikuara nga kjo marrëveshje për palët do të përcaktohen për çdo rast, me anë të marrëveshjes së përbashkët ndërmjet Drejtorit të Përgjithshëm të DPPI-së dhe Rektorit të **Universitetit “Eqrem Çabej”** Gjirokastrë.

Neni 5

Hyrja në fuqi, ndryshimi dhe mbarimi

- a) Kjo marrëveshje bashkëpunimi hyn në fuqi pas nënshkrimit nga palët dhe është e vlefshme deri sa palët të kërkojnë me shkrim shfuqizimin ose mbarimin e saj.
- b) Asnjë ndryshim nuk mund t’i bëhet marrëveshjes në mënyrë të njëanshme, përveçse me shkrim, si dhe pasi palët të kenë rënë dakord paraprakisht midis tyre dhe të kenë autorizuar ndryshimin nëpërmjet nënshkrimit nga titullarët e palëve.
- c) Shfuqizimi në mënyrë të njëanshme i kësaj marrëveshjeje mund të bëhet në çdo kohë nga secila prej palëve, por duke lajmëruar me shkrim 30 ditë më parë palën tjetër.

Neni 6

Monitorimi i zbatimit

- a) Me qëllim vlerësimin e suksesit në përmbushjen e objektit dhe qëllimit të kësaj marrëveshjeje, DPPI merr përsipër të përgatisë një raport vlerësues çdo vit nga data e hyrjes në fuqi të marrëveshjes.
- b) Raporti vlerësues do t'i paraqitet për miratim palës tjetër, pasi ky raport të jetë diskutuar më parë në takimin e përbashkët mes përfaqësuesve të të dyja palëve, që mbledhet për këtë qëllim.

Neni 7

Personat e kontaktit

Palët bien dakord të caktojnë personat e kontaktit për ndjekjen dhe zbatimin e marrëveshjes në mënyrë shkresore, menjëherë pas hyrjes në fuqi të kësaj marrëveshjeje dhe sa herë që kërkohet zëvendësimi i tyre.

Neni 8

Dispozita finale

- a) Marrëveshja hartohet dhe pranohet nga palët, duke nënkuptuar se asnjë pjesë e saj nuk është në tejkalim ose kundërshtim të dispozitave përkatëse ligjore, mbi të cilat palët mbështesin ushtrimin e funksioneve dhe kompetencave e tyre.
- b) Palët zotohen të zbatojnë vullnetarisht dhe në kushte mirëbesimi këtë marrëveshje, për sa parashikohet në të. Mosmarrëveshjet zgjidhen me mirëkuptim. Në rast të kundërt, secila nga palët mund të tërhiqet dhe të ndërpresë në mënyrë të njëanshme marrëveshjen, sipas përcaktimit në nenin 5(b).

Marrëveshja e bashkëpunimit hartohet në 2 (dy) kopje identike dhe nënshkruhet në Gjirokastrë, më datë 28/03/2024.

**DREJTORIA E PËRGJITHSHME E
PRONËSISË INDUSTRIALE**

**UNIVERSITETI "EQREM
ÇABEJ" GJIROKASTËR**

DREJTORI I PËRGJITHSHËM

REKTORI

Znj. ROVENA BEQIRAJ

Prof. Dr. BEKTASH MEMA

